

PREMIO LETTERARIO "MONTANARU" (SEZ. I[^])
A MONTANARU

De Montanaru, sos versos alados
A nos ammentan, tantas cosas bellas,
Ca pro meritu sou a sas istellas
De s'altu chelu, si che sun pigados.

De logu sou, sos sites amenos,
Motivos pro cantare, dadu l'hana,
Ca s'estru sou, fit perenne funtana
De rimas nettas, e cunzettos pienes.

De omines arvudos in berritta,
Ch'hat bidu in baddes, e costas solianas,
De valentias insoro, e baldanas
Lassadu, hat calchi pagina iscritta.

Oltres sa poesia fit sa cazza,
Sa passione sua preferida,
Gustu, chi gustu, s'hat lead'in vida
Cando essiat cun canes de razza.
Non solu, ma in temas de Amore
Toccadu 'e passionnes, hat sa chima,
E s'hat de tottu godidu s'istima
Pro su cumportamentu sou signore.

Tra sos amigos suos, Pedru Casu
Fit unu 'e altos genios morales;
Cun Pedru, fin amigos e fedales
Ambos elettos fizos de Parnasu.

A San remo pro s'alvur''e s'Olia,
S'indiscutibile premiu l'han connottu:
C'a isse l'hat distintu subra 'e tottu
S'intoccabile sua poesia.

In su sonetto, a sa sua nadia,
(fiera e ruza) isse la deffinit;
Bantu chi dêt finire, cando finit
Su mundu, 'e ospitare zente bia.

Cando 'e luttu proat sos fragellos,
Cantende penas suas e turmentu,
Custu diletto fizu d'Ennargentu
Hat criadu sos versos pius bellos.

A settantan'annos sas fadigas
Finit, e si che olat a sa gloria,
Posca chi eternizat in s'istoria
Tantas vicissitudines antigas.
Sa Filumena 'e M.Lidone

MANDIS ANTONIO
VILLACIDRO